

四庫全書

集部

欽定四庫全書

集部

敬業堂詩集卷一

詳校官左中允臣瑯五珠

助教臣常循履勸

總校官庶吉士臣倉聖脉

校對官庶吉士臣吳裕德

騰錄監生臣吳有禧

欽定四庫全書

集部七

敬業堂詩集

別集類六

國朝

提要

臣等謹案敬業堂詩集五十卷

國朝查慎行撰慎行有周易玩辭集解別著錄  
是編裒其生平之詩隨所游歷各為一集凡  
慎旃集三卷端歸集西江集共一卷踰淮集  
一卷假館集二卷人海集春帆集獨吟集各

一卷竿木集題壁集共一卷橘社集勸酬集  
湓城集雲霧窟集各一卷客船集並轡集共  
一卷冗寄集一卷白蘋集秋鳴集共一卷敝  
裘集酒人集共一卷游梁集皖上集中江集  
各一卷得樹樓集近游集共一卷宿雲集一  
卷炎天冰雪集垂索集共一卷杖家集過夏  
集各一卷偷存集繡經集共一卷赴台集隨  
輦集直廬集考收集甘雨集西阡集迎鑿集

還朝集道院集各一卷槐籜集二卷棗東集  
長告集待放集計日集齒會集步陳集吾過  
集各一卷夏課集望歲集共一卷粵游集二  
卷附載餘波詞二卷自古喜立集名者以楊  
萬里為最多慎行此集隨筆立名殆數倍之  
其中有以二十四首為一集者殊病其傷於  
煩碎然亦足徵其無時無地不以詩為事矣  
集首載王士禎原序稱黃宗羲比其詩於陸

游士禎則謂竒創之才慎行遜游綿至之思  
游遜慎行又稱其五七言古體有陳師道元  
好問之風今觀慎行近體實出劍南但游喜  
寫景慎行喜抒情游喜隸事慎行喜運意故  
長短互形士禎所評良允至於後山古體悉  
出苦思而不以變化為長遺山古體具有健  
氣而不以靈敏見巧與慎行殊不相似核其  
淵源大抵得於蘇軾為多觀其積一生之力

補注蘇詩其得力之處可見矣明人喜稱唐  
詩自

國朝康熙初年窠臼漸深往往厭而學宋而生  
硬率俚之病生焉得宋人之長而不染其弊  
數十年來固當為慎行屈一指也乾隆四十  
三年十月恭校上

總纂官臣紀昀陸錫熊臣孫士毅

總校官臣陸費墀

--	--	--	--	--	--	--	--	--



敬業堂詩集原序

老友海昌陸先生辛齋嘗攜其愛壻查夏重詞一卷見示且曰此子名譽未成冀先生少假借之弁以數語其時余官曹署冗俗碌碌未及為也及余轉官司成則夏重與其弟德尹後先入成均余乃得以一日之長臨之德尹旋與友人入粵而夏重肄業橋門離經鼓篋魚魚雅雅弱不勝衣近是黃叔度一流乃其詩若文則又洵葩冪兀奔發卓犖蛟龍翔而虎鳳躍今之詩人或未之

能先也然且深情獨寫孤韻一往令人諷咏徘徊乍不能已蓋夏重既辛齋玉潤且為吾友勉齋黃門猶子仍世通顯胚胎濡染昔人有云半千孫固應爾姚江黃晦木先生常題目其詩比之劔南余謂以近體論劔南奇創之才夏重或遜其雄夏重綿至之思劔南亦未之過當與古人爭勝毫釐若五七言古體劔南不甚留意而夏重麗藻絡繹宮商抗墜往往有陳後山元遺山風後山凌厲峭直力追絕險遺山矜麗頓挫雅極波瀾吾未

敢謂夏重所詣便駕前賢然使起放翁後山遺山諸公  
於今日夏重操螯弧以陪敦槃亦未宥自安魯鄭之賦  
也且夏重學有本根斷斷自愛子瞻曰一時文人如魯  
直補之無已文潛少游吾未嘗以師資自處皆以朋友  
待之而吾乃以一日之長臨夏重乎顧屈指同學其才  
可到昔賢者正復無幾蘇門諸君子與放翁後山遺山  
皆名節自持凜凜有國士風蓋有重於詩文者而詩文  
益重吾方處夏重於諸公之間正以其詩而又不取限

之於詩也去冬余奉使南海夏重操長歌送行且以詩集序見屬歸而夏重慎旃二集已哀然成卷帙矣余既已諾昨者之請重憶辛齋疇昔之言時已卧病請假匆勿戒道尪驢在側僕夫俶裝援筆以完宿約益於夏重與夏重之詩皆有不能自已於言者夏重其益勉之異日相見其必有更進乎此者矣濟南王士禎序

己未春余奉

命撫黔陽而同邑查子夏重短衣挾策自吳涉楚追及

之於荆江夢渚之間其時疆場未啟豺虎塞塗余提戈  
束馬自銅仁間道崎嶇谿谷崖箐孤軍轉戰一旅深入  
帳下健兒能從者不過數十人而夏重獨忼慨與俱經  
年而後抵貴治相與仰視飛鳶俛蹈荆棘烽火晝紅簫  
笳夜咽未嘗一日不同之也軍府初開書檄劬午調遣  
徵發將伯助余倉卒肆應又兩年始定夏重則去余歸  
里往謁其觀察世父於鄱江焉夫以白面書生年未及  
壯弱不勝衣骨稜稜出衣表乃能骯髒自喜如此則已

齷齪豎儒異矣顧復戎旅之頃不廢吟嘯握槊賦詩磨  
盾草檄軍中有傳修期既隱若敵國兼得陶寫歲月瘴  
雲如墨毒草搖風以賦咏當悲歌浣花工部不履行間  
淮蔡軍諮羌無篇什庶幾小益之戎賡競傳劔南之詩  
句藻采橫飛綺思艷發抑又多焉何其壯也今年夏重  
入游太學而余適膺

召命歸佐夏官因復留之卯舍夏重乃裛其行旅之詩  
梓之問世其豫章之吟別為一集題曰慎旃蓋取詩人

行役之義且屬余為弁語夫詩人有言維予與汝往者  
貴竹之日余與夏重真同蛩駘回首蠻烟驚心駭魄歷  
歷如在目睫序夏重之詩非余又誰屬也因為纂述舊  
遊書之卷首若夫齊紈未貴菱歌萬金夏重業已狎主  
齊盟又無俟余稱說矣同里楊雍建序

余賣藥海昌查子夏重屢有詩疇和尋其佳處真有步  
武分司追蹤劍南之堂奧者夫今人卒業兔園孰不以  
風流自命左揆右攜東綆西繙都欲駁正李杜之瑕塵

元白之卑弱為漢為魏為陶為謝目空千古苟從旁細  
覈正如揚灰萬斛求半銖銅鐵且不可得況於金乎此  
所以深歎於才難也夏重視彼猶孤鳳獨鶴翱翔於百  
鳥雞羣中可謂橫絕一時者矣復能謙退以好善微特  
不敢輕議古人抑有味乎水樂樵歌俱將引為筆墨之  
助此非取法淺陋也惟其知作者苦心一字一句莫不  
有深意於其間若屬目麈浮矢口妄論真耳食吹聲徒  
作撼樹蚍蜉爾夏重是編自己未至壬戌四年間水陸





然麻姑年少將見蓬萊揚塵不難返海外之逸書使歸  
學宮摻龍宮之秘圖傳諸人間斯蠹粉陳言又奚足云  
刻中老友黃宗炎纂

夏重自黔歸哀其三年往反道路之詩自題曰慎旃集  
吾友黃晦木先生喜而序之為獎許其所已至而勉惜  
其所未至晦木夏重尊人逸遠畏友儻然以古道自處  
夏重既拜而登之集矣今年余偶來燕臺夏重方客燕  
未返其同學友人欲梓其集燕中乃過余而請曰小子

不幸早失怙恃舍其先人之廬奔走四方冀以續食晦  
木先生所云青燈四庫杳然夢寐斯集所留與嶺猿瘴  
鳥相為和荅勞者易歌不自知其言之長也然而山川  
登涉動魄驚心追思昨夢讀之而怛怛心悸不欲便付  
摧燒姑應友人之請丈人亦有以終進之乎余應之曰  
子之詩自附於陟岵詩人之義夫亦知詩人之根抵乎  
夫陟岵之詩人疲勞困頓晨夕不遑而於父母兄弟三  
致思焉忠孝悱惻之懷咏歎淫泆而不能自己此固風

雅之本原而非流俗之咏唱也今之稱詩者挾持唐宋  
頌酒爭長各為門戶余竊以為皆非也夫詩何分唐宋  
亦別其雅俗而已古之詩人其志潔其行芳自託於芝  
蘭芳草而絕遠蕭艾故雖至坎壈失職卻曲於傾軛駭  
駟之途而耿介特立終不移於積俗以此求之陶彭澤  
杜浣花之流操持卓犖磊砢傲兀凜凜皆有國士風故  
其為詩迥然自遠於俗即白分司諷諭間適諸篇言近  
指遠一唱三嘆真得風人之遺與元亮子美同其根柢

而不知者妄謂之俗嗚呼耳食拘墟之徒又豈足與論  
六義之旨趣乎夏重稟承庭訓濡染家學反覆四始之  
際既已有年一旦遠涉江河崎嶇貴竹發而為詩依然  
陟岵之思悔木老友以為上武分司而下追射的一言  
為智知其不輕借游揚也且悔木以父執登堂門庭無  
恙牛官豕柵橘圃魚陂俛仰流連乃更以青燈四庫欲  
廣夏重之意夫亦以先人手澤存於縹緗卷帙間冀使  
無忘其根柢爾夏重勉之歲月易遷盛年不再計夏重

挾策遠遊之年正與余抱疴焚研之歲等雙丸轉轂余已素髮被領老大空悲了無可紀夏重詩已見許前輩春華之藻恃本根之不拔耳根之盛者其枝幹日益繁慎旃之詩夏重之本末存焉無俟訪逸冊而搜秘圖益保其陟岵之思而已輒以此勉夏重且請更質諸晦木冰叟陸嘉淑序

慎旃二集者吾友查子夏重遊豫章之詩也初查子自巳未遊黔至壬戌而歸名其詩曰慎旃集今自癸亥遊

豫章至甲子而歸復名其詩曰慎旃二集蓋皆取孝子  
行役不忘其親之義也嗟乎查子乎遊乎而欲慎旃乎  
古昔盛時民有恒產士有常糈負耒橫經溫清定省安  
所事遊其偶有遊者不過賢勞王事耳故孝子行役而  
得以慎旃自勉至春秋戰國之世而士以遊名朝秦暮  
楚已有不遑言慎者矣然孔子曰遊必有方孟子曰人  
知之亦囂囂人不知亦囂囂則是遊亦未嘗不得慎也  
天變人窮最困者莫如四民之首飢來驅我急何能擇

其尚能有方乎曳裾無門投筆安在其尚能囂囂乎於此之時而欲慎旃難矣且夫查子之遊豫章也鄱陽之險不若洞庭之惡也洪都之近不若鬼方之遠也六月之暫不若數載之久也舊遊詞客往還唱和之樂不若蠻獠寇賊戰爭殺戮之慘也較之遊黔之役又似可以無慎而查子慕親之誠守身之孝每念不忘用名其集余於是而歎陟岵詩人何代蔑有決不得以古今時地限也世衰學喪風雅道淪言宋言唐言魏言漢紛紛聚



訟之徒類皆飲潘拾唾正如家僮路乞各張勢豪所有以相矜詡而不自知其妻孥安在彼豈不聞虞廷言志之說哉勢利薰溺情性銷亡隻句單詞詳世取寵自謂言志而其實無志之可言也得查子慎旃之意而振之登山臨水感時咏物吊往驚離無往而非不忘其親之心所寓楊用修謂詩須有為而作蓋自三百篇而降屈大夫陶彭澤杜工部千古俱有同旨寧謂風雅一道不可自此而復續乎彼區區以韓歐蘇陸之間擬之者猶

皮相矣余病留京邸因懷岵岵之望不欲受人牢籠間  
或自鳴其酸苦遇塵堆糞壤之人輒秘不使見唯查子  
與一二故交至始出與誦之暑退秋來襍被南返查子  
過別索序此編長吟低諷慨然喜其與余有合也易曰  
同聲相應余其能無言哉同學弟鄭梁題於燕京旅次

欽定四庫全書

敬業堂詩集卷一

翰林院編修查慎行撰

慎旃集上

盛已未  
一年

已未夏同邑楊以齋先生以副憲出撫黔陽招余  
入幕時西南餘寇未殄警急烽烟傳聞不一而余  
忽為萬里之行其在陟岵之詩曰尚慎旃哉由來  
無棄夫當行役之時不忘父母兄弟而終以危苦

之辭讀其詩者傷其志焉余不幸早失怙恃終遠  
兄弟麻衣被體瞻望漣洏因取慎旃以命集自勵  
也亦以慰子季也自己未迄壬戌首尾三年凡如  
千首釐為三卷

遊燕不果乃作楚行

北道初停轍南轅未息戈一門初約變岐路獨行多不  
是彈箏客誰為擊楫歌也知田舍好壯志恐蹉跎

留別仲弟德尹二首

形影何當出處分君應憐我我憐君孤雲出岫寧無意  
獨雁衝寒奈失羣門戶全生終碌碌兵戈絕徼尚紛紛  
虎頭分少封侯骨投筆聊從萬里軍

雞聲驚起對床眠纔說江關便黯然與爾未曾經遠別  
得歸難定是何年渡江風物悲元亮懷土人情感仲宣  
瓦屋三間門兩版頻煩為我掃東偏

酬別盛鶴江徐淮江程禹聲次禹聲原韻

輕橈夾岸柳參參短笛長亭最不堪江路恰逢鴻雁北

山程遙指鷓鴣南，異時對酒懷重五。同調關心記兩三，  
此去湖湘烟水濶。鷗波長自夢春潭。

京口和韜荒兄

江樹江雲睥睨斜，戍樓吹角又吹笳。舳艫轉粟三千里，  
燈火沿流一萬家。北府山川餘霸氣，南徐風土雜驚沙。  
傷心蔓草斜陽岸，獨對遙天數落鴉。

曉發梁山

一鉤殘月吐，仍銜薄霧濛濛著。布帆行過天門天未曉。

風來東北路西南

贈胡星卿先生胡之先東川侯海其子觀尚南

康公主

祭戟侯門奕葉光可能無意感滄桑  
草廬望重名賢宅竹苑年深貴主莊  
滿地秋瓜仍爛熳渡江春燕只尋常  
白頭一老鍾山下筋力猶看八十強

題王璞菴南北遊詩卷

我初未見聞君名十年懷抱一夕傾  
眼中指顧空豪英

乃欲以詩鳴不平蓬萊時作蒼茫行江南江北無期程  
流離滿前皆孩嬰道旁見之淚縱橫爾生其間一蒼生  
補救敢與乾坤爭俛今仰古氣孰櫻長篇倚劔頃刻成  
東將入海手掣鯨嘲弄花月非人情余從涉江來舊京  
足所遊歷手勿停君詩直壓小謝城如以六國當秦兵  
聳肩維誦作大聲煌煌高燭燒長檠須臾街鼓報五更  
紅日欲吐東方明

登金陵報恩寺塲二十四韻



不盡興亡恨浮圖試一登孤高真得勢陡起絕無憑法  
轉風輪翅光搖火樹燈地維標寶刹天闕界金繩碧落  
開千里丹梯轉百層規模他日壯感慨至今仍禍自歸  
藩啟兵從靖難稱比戈殘骨肉問罪假疑丞袞冕俄行  
遜戎衣遂謁陵朝家同再造國事異中興此舉無名極  
當時負媿曾兩京雄岳峙一塔鎮觚稜銖兩材俱稱纖  
毫辨欲矜琉璃紛紺碧欄楯落鮮澄事本誇餘力基猶  
念丕承監宮留太子給俸濫千僧原廟衣冠冷豐宮獻

卜增侈心崇梵竺神道託高曾世往疑經劫人來乍得

朋

同登者  
六人

雲烟爭變幻日月幾升恒絕頂盤旋上虛窗

偏仄凭近身棲怖鴿側背躡飛鵬勝境才何有高歌氣  
或騰鍾山青入望相對故峻嶒

金陵雜咏二十首

并序

僕年三十始至舊京路近一千還同異域感生涯之  
已晚歎故事之無徵彼都人士憶南渡之風流故國  
山河見北邙之陵寢四百八十寺烟雨猶新三萬六

千場笙歌頓歇袁羊因而狂憤衛虎所以神傷況以  
飄零再當搖落芳樹攀條泪盡臺城之妓金釵插髻  
魂消綺閣之歌凡江干覽物之端皆遊子言愁之什  
敢自信其可傳真知音之勿罪云爾

沙漠真人本至尊青蛇罷祀出梧垣孝陵松柏猶樵牧  
元廟何妨有淚痕

想像承平樂事留履綦陳迹也風流輕烟翠柳今何處

明初妓  
館名

十六門如十六樓

洒掃他時屬內官鐘聲好句逼人寒御溝儘有流紅事  
塵壁傷心是媚蘭

夜半傳呼聚寶門金蟾齒鎖內城昏武皇大有南遷意  
故遣鑿輿宿報恩

蒙溪石刻表南都形勢居然屹壯圖白馬青絲他日事  
倉皇曾補一毫無

妙選三家入後宮抱來馬上石榴紅胭脂不到長城外  
何必明妃怨畫工

武定橋欄玉磬如泠泠  
七尺響清虛蜀桐不發岐陽扣  
等是崑岡劫火餘

宗伯奩清世不知菱花初照月  
臨池點粧巾帽俱新樣  
不用喧傳鏡背詩

杏村玉樹接春華  
太史詩留典客家不許繡毬誇  
獨絕  
鳳臺還有紫微花

薛鴨袁羊七箸餘  
江鮮風味只如初  
年年八月隨潮上  
柳貫紅腮燕子魚

粉竹香塵調不齊和來雁字鬥高低  
即從紅豆徵奇麗  
便壓元人十四題

頓老琵琶擅教坊供筵法曲別歌章  
故須小技通文義  
垂老知音付漫郎

雷雨隨絃四座驚秀之絕調自泠泠  
隔簾傳語催停板  
頭白扶來制淚聽

昭文小楷法黃庭繡佛新詩玉琢成  
不及錦雲名句好  
斷腸芳草斷腸鶯

一月花名簇錦筵  
舊家手帕亦因緣  
曾陪盒子春筵會  
冷落飄燈四十年

鼇足盤龍氣象吞  
東華扶出尚驚魂  
書生小膽當前破  
何取紛紛出大言

後村傲兀自竒才  
覓句曾過此地來  
春草不生山路白  
樹陰濃罩雨花臺

卧遊宗炳已傷神  
畫社秦淮點染新  
怪得江山生色少  
少岡老死更無人

金史曰... 卷一  
鈔庫街頭第一坊遊人消渴試新嘗近來曲巷添茶社  
誰記新都是濫觴

名士年來已可嗔騎驢腰扇怕逢人李昭竹骨王郎畫  
難掩西風障扇塵

蕪湖關

昨日出龍江今晨抵蕪湖順風滿帆幅過關快須臾關  
吏責報稅截江大聲呼舟子不敢前楫柁轉轆轤余笑  
謂關吏竒貨我則無聯吟三寸管壓浪百卷書船頭兩



巾箱船尾一酒壺此外更何物隨身長鬚奴吏前不我  
信倒篋傾筐簾棄捐無一可相顧仍睚眦買酒例索錢  
迴身若責逋有貨官盡征無貨吏橫誅有無兩不免何  
以慰長途

題余鴻客金陵覽古集

神傷叔寶髻初斑詩草年年手自刪莫問六朝興廢事  
謝家名句有江山

曉出荻港

金定四庫全書  
卷一  
鞍馬習人勞舟航令人情所苦風濤爭孤篷坐掀簸般  
師喜出險拍手笑相賀輕生涉江湖緬維神力荷詰朝  
風日美百里悠揚過雲峰石門竒天勢江浮大望窮樹  
攢薺機靜魚趁舵琉璃千萬頃一葉點不破倒影白日  
深蛟龍鏡中臥江豚忽掉尾散作鱗箇箇豁然闢詩境  
遠景開淡沲

銅陵太白樓同韜荒兄作二首

不盡長江萬古流吳天遼廓倚孤舟疾風捲雨過山去

虹氣晴開百尺樓

我昔曾從夢見之精靈長接百篇詩  
豈知流落才無用  
猶羨宮娥捧硯時

遊兵營

茗茗指衡湘屈蟠路如蛇  
江天風月夜往往聞清笳  
尋聲向曲岸燈光出薰葭  
古哨聚遊兵汎地錯犬牙  
上下十數里塘迴互周遮  
警急一舉烽夜行禁艣  
舫茅屋三五間各自比建  
衙門前蔭垂柳屋後編籬  
笆恐爾本良

民賦斂逃科差居然長兒女戍久還成家炎荒屬未寧  
羽檄方紛拏惜哉好身手宴坐銷精華何當鉦鼓息再  
見戶口加

那刹磯弔黃忠節公

天道本好生無端殺機伏惻然遜國際罹此靖難酷天  
下自一家諸臣義不辱侍中初出亡乞援向誰哭勢窮  
繼以死初念固不欲漸漸那刹磯洶洶怒濤蹴嗚呼蒙  
墓地乃在江魚腹賢哉翁夫人偷生不忍獨提攜及二

女感激到婢僕舉家十三口同日死江曲真難贖百身

竟用全九族當時故吏士過者不敢目葉葬同一墳

翁夫

人及二女合葬  
金陵塞洪橋北

招魂倘來復易名雖兩經

弘光南渡  
改謚文貞

廟

貌未嚴肅我思鑄遺像鎮此千山麓貧賤復何言詩成  
淚盈掬

### 雨後渡攔江磯

片雨南來壓短篷迴看天北吐長虹風纔過處雲頭黑  
霧忽消時日脚紅遠岸浮沈沙柳外危磯出沒浪花中

金步曰... 卷一  
扁舟一葉無根蒂笑擲吾生付柁工

小孤山

峨峨百里外烟鬟望歛矐峭颯兩日程始及抵山脚連  
山亘兩岸千仞排垠堦不知渾沌來孤嶼孰開鑿初從  
山背望上下勢相若兩崖忽中分老牛角紆首向陰棲  
鷓鴣石齒白磊砢其陽峰面銳鵬喙高卓卓青葱起美  
蔭遠景翳林薄脊骨不貯土長根自蟠錯旁觀倚崔嵬  
遙勢借恢擴大哉造物奇咫尺形體各中腰神女祠紺

碧架飛閣藐馬冰雪姿玉貌坐端慤小雨夜歸梁晴雲  
曉褰幕神威不在猛水怪自驚愕帖然率羣醜俛首受  
條約移舟試欲登夸險費斟酌聳肩卻步立窘若被束  
縛攀躋雖未成夜枕夢已噩起來攬帶坐波軟風力弱  
圓月光吐吞蛟龍恐驚攬

皖口

八卦依然列女墻一城斗大劃荆揚雨濃隔浦吳山盡  
風澹空江楚水長官渡無人還繫艇客程有樹但垂楊

曾經百戰東南定鼓角殘兵又夕陽

殘兵鼓角夕陽中  
明初高季迪題安

慶城樓

詩語也

### 路灌溝阻風

行李先愁過吉陽  
萑符何物尚披猖  
孤舟喜出兩關阻  
一雨能生三日涼  
紈扇雲皴山入畫  
蘆花風起客思鄉  
柴桑舊事吾猶記  
咫尺翻嫌路渺茫

### 過鄱陽湖口望大孤山次黃伐檀舊韻

江長如帶湖如襟  
廬山挈領高嶽峯  
大孤欲束湖口住



石脚下插三千尋浪頭有時過滅頂噓吸倒影影亦沈  
康郎彭郎兩不妬微步但覺凌波深西江賈兒晚泊棹  
東南月上明孤斟渚繫汀芷近楚俗水味涓潔神居歆  
羣鷗飛盡亂鴉舞瘦藤瘦棘森成陰天青沙白獻濃翠  
恍恍余目怡余心船頭擊汰船尾臥末疾不受風霾淫  
馬當之險幸已脫一壺珍重攜千金

蘄州道中

設險憑全楚江防此地遷千家猶帶郭獨客偶停船天

潤星如墜江空月最先時危憂盜賊慘澹話當年

漢口

巨鎮水陸衝彈丸壓楚境南行控巴蜀西去連鄢郢人  
言紛五方商賈富無并紛紛隸名藩一一旗號整駢駢  
驢尾接得得馬蹄騁俤俤人摩肩蹙蹙豚縮頸羣雞叫  
咿啞巨犬力頑獷魚蝦腥就岸藥料香過嶺黃蒲包官  
鹽青箬籠苦茗東西水關固上下樓閣迴市聲朝喧喧  
烟色晝暝暝一氣十萬家焉能辨廬井兩江合流處相

峙足成鼎舟車此輻輳翻覺城郭冷黃沙撲面來却扇  
不可屏稍喜漢江清浣紗見人影

漢陽晴川閣

已失當年鸚鵡洲晴川高閣却留苦嫌過客多題壁  
却笑神仙盡好樓

閣倚新創  
方士書院

粉堵日斜浮鄂渚蒲帆風

急下黃州山根一線分江漢不遣清流混濁流

題王方喬齋壁

半捲湘簾不滿鈎大江檻外日東流碧空過盡千帆影

金史四庫全書  
卷一  
一榻卧看黃鶴樓

安國寺東荷池上

蓮蓬味美差同藕荷葉香清似勝花  
懊惱休陰無一樹  
閉門長日坐僧家

漢江舟夜

露宿風餐兩月餘  
入秋懷抱少應攄  
濃陰隔浦初疑露  
晚食投竿果得魚  
夏口帆來飛鳥外  
洞庭木落早涼初  
楚天微雨瀟瀟夜  
漁火分光到檢書

漢川道中紀所見

沙岸百尺高水落岸容槁火雲蒸久旱旭日秋杲杲田  
家候雞鳴趁伴起最早放閒惜牛力飽食眠秋草不念  
婦子疲提攜及襁褓桔槔遠灌田俯仰困機巧單衣汗  
沾背滿面塵不澡鑼鼓懸柳陰兒童事擊耒金燥革亦  
乾愁聲振林杪土音帶蠻獠過客不盡曉勞歌有酬答  
各自相媚好豐荒關天運轉瞬誰得保民愚亦可憐聊  
用慰翁媪對之我抱慙饑驅空擾擾人言行路心擇食

金定四庫全書  
卷一  
苦不飽此意行已堅毋為亂懷抱

渡百里湖

湖面寬千頃湖流淺半篙遠帆如不動原樹競相高  
歲已占秋旱民猶望雨膏涸鱗如可活吾敢畏波濤

洪湖

漢江支流入洪口水勢舒緩地勢窪葑田中開畝千頃  
緯經去聲一一露渚牙殘荷尚擎歌及蓋紅蓼競吐殷鮮

花鷺鷥聳肩作人立意思閒暇窺魚蝦濱湖幾點暮烟

起曬網者漁三五家海罉半間蘆架屋黃篾十丈水占  
涯春漲生時隨斷梗秋潦退後依平沙東西北南隨所  
向泛泛何異鷗鳧駕老漁顧我笑相答客行要自同棲  
苴我聞此言發狂笑片席飛渡蒼蒼葭

沔陽道中喜雨

一枕涼侵被朝來得晏眠江清收潦後風勁掛帆前宿  
雨纔如露秋雲不近天可能涓滴意蓬勃起枯田

初入小河

魚米由來富楚鄉，入秋飽噉只尋常。如今米價偏騰貴，賤買河魚不忍嘗。

將至玉沙舟中述懷呈家季叔二首

村荒人少但寒雅，夾岸蒹葭一道斜。偶到不妨頻問俗，既來何苦又思家。愁經零露秋前草，夢吐疎燈夜半花。拋却田園荒舊業，并攜僮僕走天涯。

勞苦官居已六年，人傳綠鬢改華顛。眼明稍喜流亡復，城小曾蒙盜賊憐。五斗粟容彭澤傲，一厨酒愛步兵賢。



定知情話無窮在幾夜篝燈記不全

玉沙即事二首

銀絲壓髻學盤頭  
少婦粧成不上樓  
客久語音通土俗  
路長征戍阻炎州  
蘆中船去花搖雪  
柳外天低月吐鉤

淨洗胭脂湖水闊  
荷陰閒淡自清秋

郭外胭脂湖  
荷花絕盛

絕少魚蝦入膳庖  
豚蹄隨意散塘坳  
雞棲茅店鴉爭食  
燕去蘆廬鼠齒巢  
暗窟草深移蟋蟀  
晴絲露重綴螭蛸  
乍來寂莫荒江曲  
欲賦蕪城感慨交

初得家書

九十日來鄉夢斷  
三十里外客愁踈  
涼軒燈火清砧月  
惱亂翻因一紙書

與韜荒兄竟陵分手兄至荊州余往監利滯留  
且一月矣作詩以寄

長江多蛟龍  
噓吸通潮汐  
兩人行結束  
悵悵將奚適  
維時夏苦旱  
千里火雲赤  
壓頭一扇蓬  
炙背等煎迫  
而我於其間  
狂吟快新獲  
兄詩工而遲  
顧我速以拙  
篇成必

傳示瑕類互指摘我賞兄不疑兄領我蹙額丹砂百煉  
金點鐵隨手擲文從字怪發往往到擊節績學兄貫穿  
懸河瀉胸膈陳言務掃蕩妙解生創闢文章竊願學下  
語頗不擇兄為啟其鑰竒正示體格經經而緯史較若  
分黑白溯流止一源馳騁戒匆隙有時雜遊戲間亦事  
博奕枯碁紙畫局低手兩笨伯毫末勢必爭怒容毛髮  
磔推枰起相詢衾枕紛狼藉幸未投諸淵俛首旋拾摭  
匆觀但移晷一笑意已釋我飲僅半升兄傾可一石村

沽必盡量醉語有終夕舟子訝未聞家奴慣不嚇漢陽  
半月住又復事行役竟陵暫分袂謂作浹旬隔余去向  
玉沙兄行指鶴澤萍蹤忽漂散踐約苦難責吾叔方南  
征輸將任煩劇尺陵用兵地久滯佐籌畫西風吹客衣  
稍欲換絺綌冷暑啼寒蟹庭柯響撼撼獨來閱中秋消  
息斷咫尺豈如孤舟夜臥起同枕席正當盛壯時長駕  
困短策依回投幕府此段良可惜我年雖少兄本性奈  
孤僻輪囷剝肝膽感憤腕徒搯妻孥敗人意兼顧終無

術鹵莽一出門何從筭游跡歸與須早計惆悵分飛翮  
從監利至荊州途中作

餘恨空傳割據還青天了了隔江山

對岸為華容諸山

人來小

雨初晴後秋在垂楊未老間望遠易成千里隔時危敢  
愛一身間荊州亦是從軍地怪得叅軍語帶蠻

初至荊州韜兄出岳家口留別絕句見示和一  
首

竟陵小別無多日又向江陵把一樽此夕憑君談客況

已如三峽聽啼猿

呈大中丞楊公二首

烏巖要荒路幾千牙門小駐且江邊

時駐節  
荊州

他年峴首

沈碑會不羨龍山落帽筵千古英雄皆史冊一時形勝  
又山川從今覽眺猶多暇只在披圖聚米前

樓船直下擁旗旌絕勝貔貅十萬兵吳漢威名如敵國  
魏公倚重抵長城鐵橋徼外先聲度銅柱天南赤手擎  
若問封侯何事業征南原是一書生

重陽後六日奉陪中丞公登龍山落帽臺次原

韻

遠上坡陀碧水灣蒼然平楚夕陽間可無好事傳新句  
恰有佳名似故山

余所居在龍山故云

霜氣銷來還綠樹狼烟起

處是烏蠻陪遊不少鄒從事此日風流媿再攀

荊州與楊語可別

一身萬里逐南征八口村居累不輕入幕稍酬賓主分  
勸餐真見弟兄情雨清江館啼猿夢天濶砧鄉去雁程

金史四庫全書  
卷一  
莫怪從軍還作賦，仲宣樓畔尚徵兵。

荆南秋盡野鶴羣飛揚，公有詩屬余並作。

遠遊望滇黔，萬里方汗漫。中途得小憩，朝爽快清盼。野  
鶴亦出遊，聲聞自天半。來從織霓端，倏過蘆花畔。紛紛  
排雁陳，一一作魚貫。或前如導引，後者敢奔竄。成羣似  
得朋，獨往寧無伴。感通在聲氣，形影有聚散。應防凡鳥  
嗤，未怕戈者篡。那將間人目，送汝入霄漢。豈無好爵縻，  
乘軒方好戰。當年羊叔子，坐鎮示間晏。可憐烟霞姿，曾



作耳目翫氈氈驅對客妙舞恥輕炫故澤今重來華表

如再見

荆南有鶴澤相傳  
羊叔子養鶴處

但令鍛雙抵警露報昏旦拾

粒仰稻梁野性恐不慣聳身托風馭毛骨庶可換我欲  
從之游招手已難喚

荆人田芝來年老好事所居城南隅瓦屋三楹  
小庭曲砌雜蒔花竹性喜蓄錦石貯以瓷盆清  
泉涵之因狀命名乞余分咏余以其名不雅不  
欲作詩重違其請賦一章以示意

風日媚冬暄行行歷郊陸登高三百步埤堦轉城曲墻  
頭見鵲巢老樹出修竹叩門得小憩寄興抵巖谷白鬚  
揖相迎一笑情已屬小庭容旋馬闢徑故蟠伏插籬竹  
架格對面植花木隔簾霜氣清老葉冬猶綠井然見位  
置頗未嫌局促琴書了無塵几榻淨如浴清泉貯磁斗  
浮面不盈匊纍纍錦石圓紋理細可矚紛紛誇示客手  
點口品目寓形窮想像比喻借金玉余笑戲謂翁此事  
取遠俗有生經喪亂奇貨手翻覆錦繡拆麟鳳珠璣裂

奩軸君家茅堂清枅拱無改築收藏恃無恙彼好非此  
蓄奈何清玩具反以穢名辱託名喪其實石意恐不欲  
何如兩相忘碌碌復碌碌

初冬登南郡城樓

牢落城南賣餅家空傳形勝控三巴天寒落日千羣馬  
葉盡疎林萬點鴉沙市人來穿故壘渚宮烟暝動悲笳  
累累新冢荒郊徧還有遺骸半未遮

寒夜次潘岷源韻

金定四庫全書  
卷一  
一片西風作楚聲，卧聞落葉打窻鳴。不知十月江寒重，  
陡覺三更布被輕。霜壓啼鳥驚月上，夜驕飢鼠鬪燈明。  
還家夢繞江湖濶，薄醉醒來句忽成。

雪後

繚牆茅屋閉孤城，寒壓鼃厨火未生。連日窮陰疑有雨，  
五更微雪徑成晴。坐銷短晷經檐影，閒聽隣家壓酒聲。  
天意似催梅信早，望鄉孤客最關情。

荊州雜詩六首

要害西南最乾坤百戰餘孤城還矢石陳跡遂丘墟  
日吹笳外枯風落木初暫來戎馬地慙愧得安居

三戶亡秦讖孤軍覆楚師難消終古恨常動後人思  
形勝今何用英雄事必奇挑燈繙史傳渾似覆枯碁

中山存後稟失路亦依劉大局分三國深心借一州  
圖王須得勢割據豈同仇滿眼俱豚犬應思孫仲謀

梁元仍舊鎮此地屢稱兵禍福憑方士干戈盡弟兄  
戎衣臨講殿詩句到巡城世亂文何用君王乃好名

枇杷門外路降表是前驅建業無王氣湘東只霸圖占  
星憂客位給札笑家奴秋草荒郊徧元陵問有無

南郡風流地雄藩穀久推梨花前隊擁紅粉後車來馬  
酒分麀飫狐裘逐兔回明明軍令在蜀道幾時開

洪武銅砲歌

荊州城頭古銅砲洪武元年戊申造土花剝蝕鏽微生  
首尾撐撐任顛倒憶時偽漢方縱橫虎視江東勢輕剝  
旄鉞鄱陽一戰收割耳淋漓行告廟荆湘指顧入圖版

駕幸武昌憫苗獠遂令守土頒火器何異分藩鎮險要  
邪許聲中走百夫巨材作架牛皮冒二百餘年烽燧冷  
講武承平背時好何來寇賊忽披猖將士倉皇棄牙纛  
可憐橐鞬等無用下策火攻恃騰趨底貢初曾致島夸  
後來特賜紅夸號豈知將軍竟負國俯視焦原縱羣盜  
彼非吾產且勿論爾獨胡為亦忘報長弘碧血釁未足  
鴟尾懸目慘無告羸顛劉蹶誰惜之去者自悲來自笑  
而今西南又轉戰形制雖存力難効我來見汝荆棘中

并與江山作憑弔金狄摩挲總泪流有情爭忍長登眺  
荊州護國寺古鼎歌

臨淮王氣日盪摩東吳西漢兩燭蛾天教禹鼎歸一統  
掃蕩不再煩增落煌煌開基自建鄴豐沛大風時作歌

金枝玉葉出九塞帶礪錫誓如山河

名山藏分藩記遼  
王植洪武二十五

年自衛改封成祖靖  
難後王自請移荊州

荊州要害古重鎮水合沱澧山岷

嶠親藩改封頒重器汾陰寶氣移騰那遼宮北望四千

里輦致遠自清泥塢

遼東地名見  
遼史本紀

吳牛回首喘甫定辟



易罔象潛蛟鼉中容百石外菌蠢價重奚啻千銷鍋白  
日蓬蓬霽雲起清宵馥馥香烟和百餘年間封未絕嗣  
王拱壁垂絛網力營梵寺覲祈福丹碧插漢高嵬峨棧  
齶層級疊塔砌杲魚繪藻連重阿明珠百八綴瓔珞黃  
金丈六袞韋馱憑將此鼎配清供位置端正平無頗千  
林散花傳蒼筍七葉覆影依樓櫺居人空巷競頂禮一  
日萬手爭摩挲年深餘潤溢精采斑駁青綠紋成螺厥  
初賜額號護國豈意國步旋跌蹉西北忽傳盜羣起轉

掠印契搖牂牁叢祠狐鳴妖廟火雄王雌霸紛么膺公  
然出陘入曠衍楚境芻突其誰何鳧毛東浮蔽大海轅  
塵南下驚織羅黃巾方見劇賊走白獐又報官軍過紅  
蓮幕乏庾長史碧油幢引楊沙哥廟廷無人經略拙覆  
餽折足遑知他北門吠犬失利苾南徽跼鳶悲伏波簡  
書右方半塗改泮水左耳全欺訛中軍但思挺鹿豕列  
陣孰肯領鸛鵝九州聚鐵鑄一字百金立木招羣魔腰  
間大弓肅肅羽掌上利劍霍霍磨濕梢積屍填巨壑洗

城漂血生盤渦烏飛白頭竄帝子馬挾紅粉啼宮娥魯  
藏大盜竊寶玉武庫烈焰燔瑇戈玉魚晨穿赤蟻穴金  
虎夜落毛蟲窠神焦鬼爛逃后羿天驚石破愁皇媧王  
坤驚聽或滲漏諾臯載紀從譏訶是時古鼎乃無恙疇  
役丁甲來撈呵乾坤元黃蟻旋磨日月來往龍騰梭爾  
來一瞬四十載渚宮已長油油禾昆明土灰識燒劫銅  
仙汨雨收滂沱城中故物僅留此坐閱人代成飛柯金  
剛寶杵衛帝釋彫篆石碣敲頭陀殘僧近前為指點詞

客好事空吟哦吁嗟兮滄桑變易等閒耳區區一物奚  
足多

渡荊江

虎渡迴船日又曛旌旗高捲渡頭雲間鷗意到忽飛去  
斷雁聲多時一羣南入五溪江路盡西連三峽楚程分  
亂離光景逢人問或有新詩當紀聞

白楊堤晚泊

客行公安界榛莽遙刺天百里皆戰場廢竈依顏垣豈

惟人踪滅鴉鵲俱高騫但聞水中鳧拍拍繞我船朝來  
望澧陽稍稍見疎烟晚泊得墟落潭沙水洄沿天風鳴  
枯楊衆鳥巢枝顛居民八九家其下自名村野火燒黃  
茆瘦牛皮僅存姻親兒女舍相對籬無樊我前揖老父  
歎曲使盡言云自南北爭兵火六七年初來尚易支斗  
米換佰錢去秋忽苦旱穀價十倍前朝市有推移世業  
誓不遷况聞江南北兵荒遠袤延逋逃等無地旅仆誰  
哀憐我感此語真歔歔泪流泉有生際仗儁朝夕計孰

全悠悠逐徒御即事思田園

公安道中

折戟沈沙極望中勿論猿鶴與沙蟲  
一江路阻城猶在萬竈灰飛壁已空  
便有閒情論戰伐誰能按壘識英雄  
分明世事如償博細雨殘燈局就終

過龍陽縣

李衡洲畔水潭潭生計漂流最不堪  
拋却故園三百樹來嘗霜橘洞庭南

晚泊安鄉縣六韵

布帆衝雪到小泊記荒程沙岸冬收潦湖光晚放晴百  
家成小聚一縣得虛名路險行吟客天驕跋扈兵廢池  
猶帶樹殘壘竟無城不到干戈地誰知荆棘生

渡洞庭湖四十韵

一氣吞全楚孤舟望不窮兩儀浮澹沲萬象入鴻濛冰  
雪凝壺淨烟霞拂鏡融恍疑天四合長見日當中散作  
魚鱗去虛憑鳥道通洪流年莫紀開圻力何雄險蓄波

濤勢陰防霧雨零落帆分向背瞻斗辨西東晶晶趨靈  
域泱泱表大風回車辭崦嵫仗劔倚崆峒絕境何由達  
狂飈偶一逢未成騎赤鯉直欲駕晴虹空曠曾張樂軒  
轅想馭空鸞雛嬌嶰竹鳳珠引荆桐去約西王母行邀  
東海童舞幽潛百怪協律奏羣工貝闕清於玉冰簾暖  
似烘人間常屬耳天外或呼嵩沈壁擣辭壯燔柴望祀  
豐居然憑嶽瀆渺矣托神叢河伯憂方大蚩尤禍忽終  
長鯨摧爪甲封豕殪豨豨不分驅秦鹿終成失楚弓紛



紆吹野馬變化到沙蟲貪說含珠睡乖從割耳聾蛟涎  
腥蚌窟魚目闖龍宮往往狼爭肉紛紛雉離罟崩沙埋  
鎖杙壞板折艤舳短景西南陷浮氛宇宙充客行愁渺  
渺事往惜匆匆飄泊今無地吁嗟一倚篷向來拘眺聽  
渾似出樊籠弔古夫何及傷時又不同九疑荒率指七  
澤蕩明瞳易觸蒼茫句難消塊壘衰非才慙擊楫有識  
笑從戎不作沾泥絮翻隨別蒂蓬文詞新畫虎爪跡舊  
飛鴻壯志銷積俗流年撫薄躬中流發長嘯誰負濟川

功

臘梅和中丞公韵

一枝開異域獨秀殿羣芳  
梳額黃添暈檀心蜜作香  
折應傷歲暮力欲挽春陽  
待共梅花笑先期耐雪霜

武陵除夕

嶺徼溪山指後期  
楚天風物莽參差  
江船雨鬧羹魚市  
岸柳波柔飲馬池  
俗陋初逃兵火厄  
年荒真覺酒醪糜  
春光已作先庚報  
試看燈花爛漫時



敬業堂詩集卷一

欽定四庫全書

集部

敬業堂詩集卷三

詳校官左中允臣璿五珠

助教臣常循覆勘

總校官庶吉士臣倉聖脉

校對官庶吉士臣吳裕德

謄錄監生臣奚有禧

欽定四庫全書

敬業堂詩集卷二

翰林院編修查慎行撰

慎旃集中

盡庚申一年

喜季叔自荊州至二首

會吟期難定，蒼茫憶舊秋。烽烟隨地滿，書疏隔年收。薄

宦供驅策，空囊愴去留。荆南曾久住，回首似并州。

再見干戈地方，知骨肉恩人情。方畏虎容路漸啼，猿那

得窮無恨惟應醉勿論如何連夕話多半是田園

人日武陵西郊閱武二首

鷹揚盪決勢無前騎角相持又一年豈謂陳湯寬吏議  
尚煩充國策屯田桃花色映巴滇馬杏葉裝成子弟韜  
漫說秦人曾避地而今此地是窮邊

如荼如火望中分鼓角銚鉦一路聞黑齒舊疆仍結壘  
綠旗別隊自將軍轅門誰上平蠻策朝議先頒諭蜀文  
輸與書生工筭奕踈簾殘局轉斜曛

再遊德山為雨雪所阻留宿乾明方丈次石間

周益公石刻舊韵二首

但令興到便登山路轉  
鳧鷖第幾灣福地自留蒼翠外  
閒身偏在亂離間殘碑日月看  
仍在前輩風流許再攀  
五百年來如轉盼知從何處證無還

城外清江江上山依然  
白浪捲蒼灣雪飄燈事闌珊後  
春到梅花淺淡間竹樹一丘迷  
出入樓臺幾處記躋攀  
茶烟芋火前因在信宿留人未遣還



春晴登朗州城樓

沅水湘烟入望深，郡樓閒上當登臨。  
晴邊日作薰檐氣，亂裏歌傷去國心。  
芳草迎船迷舊岸，綠楊盤馬試新陰。  
劉申去後空城在，水次猶傳上堵吟。

三閭祠

平遠江山極目迴，古祠漠漠背城開。  
莫嫌舉世無知己，未有庸人不忌才。  
放逐肯消忘國恨，歲時猶動楚人哀。  
湘蘭沅芷年年綠，想見吟魂自去來。

朗州絕句四首

翎雀彈來新調多  
竹枝舊法定如何  
居人不解邊頭曲  
只唱西風菜葉歌

江干草市竹為椽  
容易移家逐貿遷  
昨日官軍又南去  
辰溪一路有新烟

雨餘天氣好清明  
薺菜花開去踏青  
樂令園荒桃李盡  
更無啼鳥入空城

督師聲勢震蠻荆  
父老徒誇畫錦榮  
不信但看楊相國

遺恩還在鼎州城

武陵送春

時初聞官軍  
恢復辰州

筍屐籃輿幾地逢  
春華一夢記南中  
草痕吹過青楊瘴  
花信飄殘畫角風  
燒尾蛇應流枉矢  
驚絃鳥亦避虛弓  
桃源只隔孤城外  
流下辰陽戰血紅

舟發桃源

武陵溪口朗江灣  
花落鶡啼血正殷  
楚甸回看惟見水  
蠻程從此始登山  
分穴小劫推移過  
避世遺風想像還

但使耕桑能復業仙家原自在人間

辰龍關

結陣愁雲傍水濱望中高勢故嶙峋古來形勝知何地  
天下英雄竟少人獨戍饑鴉喧落日連營荒草壓征塵  
曾經官渡相持後柵孔枝枝插柳新

海螺峰歌

楚南地窮山聚族逞怪爭竒走相逐桃源以上篁箐多  
碧玉參如春筍束海螺一峰天下竒形模彷彿神依稀

雷破鬼斧劈不得造物伎倆初奚施中豐上銳下微窄  
凹處痕青凸邊白古苔繡錯十六盤鬢髻椎高二千尺  
輕身想像窮烟霄仰天一笑天為高不知獺獠爾何恃  
騰擲絕頂相矜驕似聞老螺生海底鯤化鵬飛忽移此  
偶然蝸殼吐饞涎倒覆江干吸江水我嗤汝腹彭亨幾  
許寬安能吸盡五溪之奔湍天公渴汝一掬慳故實汝  
腹封泥丸嗚呼已實汝腹封泥丸只合棄置當百蠻胡  
為秀聳拔萬山坐令荒徼人俱頑

清浪灘

怒勢中流劈浪開  
螭龍潛處起驚雷  
衣冠如故神留像  
牙角爭雄石騁才  
鄉戶幾看疲輓運  
洪濶何事故奔積  
炎荒有路天難限  
百險終須揆施來

北溶驛

西隔辰陽纜百里  
傷心戰地見何曾  
尸拖林下烏爭肉  
瘦棘花邊鬼傍燈  
井與田平柴柵廢  
燕隨人散土巢崩  
相逢漫說從軍樂  
一飯無端百感增

辰州

連岡猛火夜燒營，槃瓠西來尚有城。  
百雉憑高經雨黑，五溪流惡入江清。  
就傾廬舍全無主，畏險舟車半不行。  
欲訪遺書尋二酉，旁人指點笑書生。

壺頭山伏波廟

功業蠻方萬古尊，當時朝諗竟騰喧。  
耿舒本意難同事，朱勃猶存解訴冤。  
馬革裹屍言竟驗，雲臺圖像事休論。  
中興諸將俱茅土，不解於公獨少恩。

發辰州馬上大雨

百折岡巒去復迴，弓刀小隊轉城隈。  
馬頭雲勢俄為雨，谷口泉聲併應雷。  
礧礧連山愁路滑，離披滿眼惜花開。  
竹雞無賴啼偏切，直送行人度嶺來。

宿五里亭

舟行脫險還遵陸，跋涉誰知險更并。  
牛跡水添三尺澗，雲頭暮轉一峯晴。  
頗聞西上攀躋苦，却笑南遊性命輕。  
細數道旁雙隻屐，辰陽辛苦是初程。



金定曰在合言 卷二

羅舊驛

陽明舊日留詩地我到偏傷亂後情  
淺草平陂荒徼路

殘陽小驛舖司城西征將帥猶堅壁

時前軍尚駐沅州

南牧牛

羊各占營此日蠻人皆佩犢不煩布穀苦催耕

午日沅州道中

一年傳旅食吳楚隔干戈蠻果枇杷熟山花躑躅多  
蒲

魚鄉國味風雨客程歌佳節今朝是誰知馬上過

沅州即事二首

萬馬南來牧宿荒，連山淺草不能長。  
營門日暮聲如沸，論擔分錢買綠秧。

官兵十萬擁巖隈，糧運頻煩羽檄催。  
米價最高薪最賤，炊烟晴散畫梁灰。

雞冠砦

絲路微從鳥道分，半空雞犬隔江聞。  
雨聲飛過岩頭砦，多少人家是白雲。

漾頭司

雲山獅口寨風俗短裙苗兩郡封疆錯孤城控制遙遺  
民收野芋狹路入山椒怕見征南騎臨江叱馭驕

自沅州抵麻陽二首

半月天無一日晴亂山處處走溪聲廢坪隔岍分秧水

楚南皆山地稍  
寬行者名為坪

小砦因高占土城

鄉民避兵者俱踞  
山築城名曰土砦

楚

樹含情如有待蠻花問俗總無名  
歎崎路在風波外不礙行人觸暑行

欲知黔楚分疆處只在孤雲兩角邊  
自是勞人貪僻路

也如渴馬愛清泉參天有勢松何健肖物能工石亦妍  
一片銅崖青入望夕陽跼跼數飛鳶

初入黔境土人皆居懸崖峭壁間緣梯上下與  
猿猴無異睹之心惻而作是詩

巢居風俗故依然石穴高當萬木顛幾地流移還有伴  
舊時井竈斷去聲無烟餘生兵革逃難穩絕塞田疇瘠可  
憐好報長官蠲賦斂獼猿家室久如懸

大雨泊黃蜡關江水暴漲黎明解纜諸灘盡失

矣

頑石堆癭疣清江曳羅帶黔山雖可憎黔水頗可愛雨  
聲怒流濁曉鏡忽破碎千年老樹枝礪石亞完塊小舸  
啣尾去脫葉舞澎湃榜人顧我笑壯士行何畏來當兵  
革交夸險視一概誰能守孤蓬鬱鬱坐久待輕生犯過  
涉既濟稍知悔

早發齊天坡

山偪嵐氣侵仲夏曉猶冷離披馬鬣濕十里霧未醒流

雲莽迴盪陸海開萬頃東日生其間金丸上修綆殷鮮  
一輪五倒射却無影蒼茫樹浮藻叅錯峰脫穎攀躋足  
力窮目賞得竒景方知夜來宿乃在最高頂

六月十五夜銅仁郡齋坐雨憶去年此夕同韜  
荒兄潯陽對月有作

琵琶亭外記停船昨歲今宵月最圓短篷迴風湓浦浪  
孤燈響雨夜郎天文章幕府才相左鱗羽天涯眼並穿  
若美歸程余較遠江樓鹵上又三千

兄時在南  
昌幕府

枕上偶成

漏盡難一鳴遙遙村砦裏須臾徧城市歷亂珠未已晨  
光澹列宿虛白上窗紙夜來江湖心夢斷不可理似覺  
柔櫓聲咿啞猶在耳

連下銅鼓魚梁龍門諸灘

上灘力相爭下灘勢相借連山百餘里一抹蒼然化輕  
舟紙作底百折穿石罅雨雹飛兩旁雷霆奮其下篙師  
心手習快若王良駕又如鼓強弩東向海門射胥濤浩

蕩來斂怒却退舍  
河神況小婢指摘或遭咤  
因斯悟至理出險在閒暇  
向來覆舟人正坐浪驚怕

麻陽田家二首

牛羊爭隘巷井白蔭高木  
村村聚一姓雞犬並食宿  
兵荒分同死男女不輕鬻  
所以五溪蠻古來多巨族

俗貧盜見棄夜戶可不設  
翻為防逃兵鄉社有團結  
隔河聞人聲睽睽鬼燈滅  
我欲從之言灌莽高百尺

浦市晤宋梅知無贈別



與子總角交賤貧互相得自從行萬里始作可憐色兩  
萍浮大海後會那可即初春得子書感子遠相憶令兄  
久辭家托我覓消息武陵快相遇恍與子面覲頗怪經  
亂離神清髮深黑報章走急足與爾慰饑愁十年一紙  
書奚啻萬金直平生骨肉恩獨往輕遠涉沅江石齒齒  
白日飛霹靂投軀試奇險聚散俱慘戚汝兄我先見我  
弟汝新別兩家兄弟間異姓派如嫡銅崖聞子來喜劇  
遽走覓買舟下浦市石觸舟中裂怖餘身幸在再理渡

江檝沙頭重把袂，迎面淚反滴。開口先暄寒，次第家事及。子言聊慰我，指似聽歷歷。舍弟辭人幕，今年復家食。

別中六寄書此度，凡兩接。

是日按德尹所寄第六札

子來喜見兄飄

泊手重執余行別，諸弟渺渺孤飛翼。同落百蠻中，悲歡儼殊域。江天秋平分，晝夜五十刻。月魄哉初生，飛蟲撲燈入。從昏話達旦，對酒唇不濕。別當爭戰場，岐路莽南北。子颿已高掛，我馬尚羈勒。去去勿回頭，涼風在蘆荻。

重陽前一日銅仁郡齋得韜荒兄豫章信

豫章書到雁程勞  
山館孤燈夜屢挑  
怕說重陽又明日  
南來何地不登高

銅仁書懷寄德尹潤木兩弟四首末章專示建

兒

客行已度萬峯巔  
咫尺西南接漏天  
雲棧險應輕蜀道  
布帆穩憶上吳船  
家書盾鼻題難盡  
春草刀環夢未圓  
了了故園東下路  
洞庭高浪白門烟

虛名小郡笑猶存  
官舍無烟米不屯  
鵝鴨池荒餘棄壘

漁樵人少但空村路窮江口船稀到山近黔東石盡髡  
最是子規啼未歇插天丹嶂起露猿

眼見青旗換白旗幾聞殊俗震餘威月斜曉虎巡城去  
風定饑烏繞樹歸超石諸營兒作戲射生別帳妓成圍  
飛書草檄非吾事悔著征人短後衣

阿庚失學阿承癡滿架殘書急護持不願生兒還似父  
尚憐有叔可為師殺雞為黍人誰過綴鳳粘珠想要奇  
便使他時能典謁草堂花發是歸期

高慎旃罷官入都索贈行之句

八年遠宦阻迴車萬里高堂悵倚廬

少司寇先生尚在堂

歸路已

遲鴻鴈後逢人猶說亂離初  
蘭成恨滿江南賦孝穆情  
真僕射書此去朝家崇吏事  
崔瞻蘊藉比何如

送雷玉衡赴印江學博任

雙江路盡還雙峽此去休論跋涉難  
秋雨隔城聞戰伐  
夕烽傳點望平安鄉程漸近  
檳榔樹宦味初嘗苜蓿盤  
昨夜尊前頻送喜燈花何負鄭虔官

得家荊州兄都下書久而未答夜窗檢笥中舊  
札因續報章并作二詩奉寄

朔南踪跡兩浮萍爾渡滹沱我洞庭橘柚候依京國雁  
茱萸會散故園星瘴鄉弓力秋來健沙磧笳音嶺外聽  
若向此遊論客況兵荒一眼曾經

陳東倘許持清議經濟如兄綽有餘夜雨新豐空作客  
秋燈絕徼又開書絕竒世事傳聞裏最好交情見面初  
如此畏塗須閱歷興闌吾欲賦歸與

銅仁秋感和劉丙孫六首

風物移黔境關城接楚邦  
亂山爭戴石細水亦名江  
遠燧連苗若孤燈冷客窗  
崎嶇經戰地游屐不成雙

吾亦疑天意人間事渺茫  
陣雲秋易結驛路晚偏長  
雞犬無安土衣冠剩古粧  
少年鞞袴好輕薄笑蠻方

郭外於菟穴城中跋扈兵  
幾時除楔猶終日逐鼉鼉  
警急傳雞羽悠揚聽角聲  
草間殘子在却立望昇平

居民竄崖谷顏狀類麕麕  
薄賦猶輸賸餘生各戀家  
銅

苗收石綠金氣辨丹砂亂裏輕蠻貨何時到客槎  
隙火飛蟲入庭隅樹影生月光經雨淡嵐氣入秋清南  
味踈鮭菜西風到鱠橙可憐鄉夢斷戍柝正三更  
莫謾愁羈旅南遊計亦良主嫌蘆酒濁客愛野蔬香珠  
米升春雪刀魚寸縷霜蹉跎叨七箸容易送流光

秋懷詩

并序

蠻城秋晚風雨淒其懷友思鄉一時并集次第有作  
得詩十六章江湖浩蕩分寄無由異日奉几杖於先



生寫心期於同好當出以相質用博和章焉

四海靈光劫燒餘名山一席老仍虛及門漸散天南北  
舊事閒隨夢卷舒黨論甘陵多擬似交情中散从何如

公朝謾有程文海又費先生却聘書

姚江黃夫子掛名薦牘知驅馳無力

不能北上也

事與心違悵久離京華一信底差池望窮難覓衡陽雁  
客到遙傳塞上詩南國霜華蓬著鬢東籬秋信菊如期  
買山歸卧談何易始覺巢由是盛時

外舅陸射山先生久留都下短章勸

駕情見

乎辭

黃浦花深護竹扉，隔江城郭鶴初歸。風生故壘餘蘆荻，

天遣西山長蕨薇。註易十年留小草，憂時一涕肯輕揮。

老裘來往錢唐路，藥裹丹爐計未違。

黃晦木先生註易垂成近復事黃治

術之

青山無恙罷登臨，收取雄才入苦吟。快馬短裘他夜夢，

荒亭野史故交心。

謂金正希先生

愁侵衰鬢絲何極，老傍窮途

感易深一片臺城，吹角外秦淮烟柳變秋陰。

王汾仲寓居白門

板輿自草間居賦駿骨何心羨築臺訝許客來論舊雨

能令人妬是奇才對門瓦屋相望住

謂斯年分虎

稱意溪花

一笑開還有江山傳好句青蓮曾到夜郎來

長水李秋錦

南戒江山破涕新博臬壺馬鬥長貧英雄混跡疑亡賴

風雨高歌覺有神一劍乾坤鳴怪事六朝裙屐笑文人

采繁橋畔留詩別母在尤宜惜政身

白門王璞菴

管鮑雷陳原有數臨岐執手語分明後來此會知何地

同輩如君豈好名薄俗誰堪論古道浪遊吾恐負平生

但令出處存初約，應諒天涯共此情。

客夏同人餞別於  
餐和堂間，故鄉社

事紛然感懷同志作

詩寄主人朱與三

憶從奉杖別岩隈，遠枉馳箋又一回。  
軍角風高蟲語合，獵塵秋早雁翎開。  
石光敲火三年過，銅柱無名萬里來。

珍重先生期許意，緘題欲報每遲徊。

家伯二南  
遠書見示

酒幔河橋柳拂絲，故人欲折並依篋。  
中行卷春留別，畫裏孤颿客憶歸。  
蠻郡秋聲迴鼓角，戰場風力展旌旗。  
賣文剩買防身劍，不改從軍一布衣。

朱人遠陳撫謙子  
祭黃主一各有文

見送繼繼之意  
別後不忘也

三徑無資謾管絃清才差勝廣文擅藍田記入昌黎集  
絳帖碑留淳化年一縣葡萄秋釀酒千家砧杵月臨邊  
豬肝不用供他客雙鵲東軒信早傳

陳子文舉家赴安  
邑丞近聞子厚亦

作晉游同  
此致意

存歿相關事恐論桓山翼折嘆賢昆

謂鳳  
司

久從恭謹傳

家法却幸諸孤聚義門二頃良田貧減價兩朝汗簡淚  
添痕買隣擬就牆東住及取遺風教子孫

祝彥方南宮  
下第閉門讀

史撫孤姪如已出言念  
及此不無存歿之傷

望衡對宇雅相親  
南阮才高不諱貧  
帶雨村舂晨隔巷  
款門燈火夜留賓  
兩家子弟如行雁  
一姓婚姻少比隣

角酒爭棋曾此地  
荒雞絕徼夢何因

王子穎右  
朝兄弟

石佛橋邊一繫舟  
遠來情感寄書郵  
關心風雨經聯榻  
輕命江山博壯遊  
木葉波仍浮楚甸  
蘆花雪又滿吳洲  
莼鱸橙蟹家鄉味  
容易懷人負好秋

徐孝績有書見存  
並簡盛鴻江徐淮

江程禹  
聲諸子

消息烽烟萬里通，憐余踪跡久從戎。  
羞言處士河陽幕，豈有書生絕域功。  
浴鐵甲分秋練白，蠟丸書倚燭花紅。  
知君矯首西南望，懷友思親一概中。

得楊尚木  
京邸書

晴川高閣揮杯後，兩度西風閱歲華。  
鸚鵡夢銷江上草，鷓鴣啼老日南花。  
舞迴雞枕宵初半，讀罷魚書飯好加。

莫道楚材多放廢，居然屈宋起名家。

漢陽王孟  
穀羅魯峯

曾作江湖同隊魚，洞庭南上更愁余。  
舊遊想像重題閣，故國平安有報書。  
去日兒童皆項領，同時牛馬亦襟裾。

捉刀未了生涯事只是羞乘下澤車

與韜荒兄江陵分  
手兄赴豫章余至

沅南相望各天音塵夏  
隔比得鄉信因寓感懷

### 同沈將雲楊魯山遊銅崖

雙江合處勢滌洄地盡中流忽有臺  
沙際馬知寒潦縮城西鴉帶夕陽回  
年深兵燹碑難讀路入榛蕪眼勸開  
片石只從開闢在題詩曾閱幾人來

### 天擎洞歌

黔江自與楚水通楚山不與黔山同  
神靈有意幻奇蹟



使我豁達開心胸  
初披榛莽覓微徑  
旋渡略約踰奔洪  
水窮雲起巖洞出  
外象軒翥中含空  
陰叢轟轟聚蚊蚋  
老骨硃硃摧虬龍  
懸崖俛瞰勢將墜  
一柱突兀撐於中  
蜂房倒垂作層級  
鍾乳亂滴穿玲瓏  
不知瀑布之源在  
何許  
天紳飄下朝陽東  
石梁截斷千匹練  
明珠迸出鮫人宮  
又疑蜥蜴吐沫散  
冰雹寒氣飈飈生  
迴風長林豐草四  
時潤  
雨露不到誰尸功

重過齊天坡

十月新寒瘴已輕，萬峰濕翠雨初晴。  
人來天際斜陽影，馬踏雲中落葉聲。  
杼軸誰憐民力盡，郵亭遙數戍烟生。  
半年遊跡愁重到，何計雲山慰客情。

再至沅州哭劉丙孫二首

幕府論交快得羣，天涯失意手重分。  
不應小別輕揮淚，豈謂重來果哭君。

中秋前在銅仁酒  
淚而別遂成永訣

盡賣衣裘供薄殮

誤他僮僕遠從軍，瓦燈相對僧窗夕。  
忍讀龍場瘞旅文。

劉官吏

目故云

偶然倡和成詩讖鵬賦長沙最不祥

丙孫秋感詩有長沙鵝似鵬鵬斷洛

陽年之句

萬里慙余稱好友一官累爾死殊方招魂有母傷

垂白昇櫬無兒等國殤拚却負薪貧也得九原應自悔

辭鄉

劉為安立相國次子

送楊魯山省覲歸里

殷勤卮酒別蠻天安穩圖書壓客船  
經眼雲山窮戰地稱心詩句遠遊篇  
綵衣綫紵三秋後白髮花穠八座前  
不載丹砂供服食閒居一賦已如仙

夜觀燒山和中丞公韵

寒空月黑燄初熏  
照夜俄生萬嶺雲  
赤熾千人爭趙壁  
火牛百道走燕軍  
危時莫以烽為戲  
我意方憂玉亦焚  
不信劫灰吹不盡  
草間狐兔尚成群

麻陽運船行

麻陽縣西催轉粟  
人少山空聞鬼哭  
一家丁壯盡從軍  
老稚扶攜出茅屋  
朝行派米暮催船  
吏胥點名還索錢  
輓轆轉絙出井底  
西望提溪如到天  
麻陽至提溪相去

三百里一里四五灘灘響流水一灘高五尺積勢殊  
未已南行之衆三萬餘樵爨軍裝必由此小船裝載纔  
數石船大裝多行不得百夫并力上一灘邪許聲中骨  
應折前頭又見奔濤瀉未到先愁淚流血脂膏已盡正  
輸租皮骨僅存猶應役君不見一軍坐食萬民勞民氣  
難甦士氣驕虎符昨調思南戍多少揚麾白日逃

雪後平溪道中

時官軍初  
復貴陽

馬足聲堅凍未融楚南晴雪照黔東百家廢井懸軍後

一路啼猿灌莽中  
斑白逢人愁鋌獸  
萑苻何地集哀鳴  
書生亦有傷時淚  
袖濕征鞭裹朔風

清浪衛廣福寺

瓦礫城隅萬竈旁  
居然古寺比靈光  
殘僧一去塵蒙佛  
畫角孤吹夜雨霜  
却過昆明灰尚黑  
年深龍漢事全荒  
斷碑知是何年物  
野火燒來栢葉香

飛雲巖

白雲本在天  
變幻隨所到  
無端忽墮此  
穴地啟洞竅  
石

髓久漸凝靈姿特神妙軒軒勢欲舉外秀中駕鶩望勞  
佛力鎮刻畫恣凌暴山靈怒不受企脚首頻掉猶虞從  
風揚出山不可叫呈形寓百怪意想得竒肖昂昂舞獅  
象狼狼蹲虎豹蛟龍護鱗甲鸞鳳披羽翮或疑人卓立  
又似波傾倒形容口莫悉覽勝難領要造物太雕刻將  
母元氣耗林泉為映帶翳引轉深奧清陰真古栢遠響  
落幽瀑遂令過客心出入殊靜躁惜哉靈勝境乃落西  
南徼好事偶一逢高情復誰較獨留陽明碑千古表巒

撩

王文成月潭寺碑記聖果亭偈石刻俱在焉

度油榨關

平明走馬出城闈，峭壁西風冷偪身。  
轉粟上天非易事，據關連柵復何人。  
雪填土窟埋屍淺，冰裂刀痕迸血新。  
等是三災逃不得，疆場溝壑兩窮塵。

題鎮遠中河寺後石洞

一片青山展石屏，天光西豁潯陽城。  
豈知躍馬橫戈地，猶有晨鐘暮鼓聲。



黎莪道中二首

馬滑前岡冷未消

冷音另黔中冬月霖雨之一候道滑成冰俗呼為冷

一鞭絲雨

上衣潮瘴茅黃過三郎鋪寒水清涵葛鏡橋

青紅顏色裹頭粧尺布縫裙稱膝長  
犴狔打牙初嫁女  
花苗跳月便隨郎

黔陽雜詩四首

蚩尤百丈吐寒芒

時有彗星之變

殺氣西南莽未央  
燕雀君臣

空殿宇蟬蛸身世閱滄桑  
亂山似作孤城衛  
橫戟誰堪

一面當錯料夜郎知漢大井蛙曾此自稱王

休將卧虎比前禽諸將功高賊未擒  
柁馬隔城邊草瘦幕烏啼曉陣雲深  
盤江路盡黔疆險鈎棧人從蜀國尋  
一片壽陽汚血地浪傳田叟哭王琳

玉斧銅標界有無苴蘭城外亟儲胥  
田橫客已辭窮島樂毅功難敵  
謫書官濫羊頭爭獻鏡謀新鼠穴可乘車  
英雄穉子論誰是廣武登臨歎有餘

吹唇沸地勢縱橫約束人稱峽路兵間道  
無援防豕突

金匱要略卷之三  
卷二  
叢祠有火散狐鳴幾年租賤催何急鬼俗流離命已輕  
勿倚弓刀能殺賊向來漁獵本蒼生

送王兎菴學博赴安順

芭蕉關前打戍鼓漏天十日九日雨西征健兒猛于虎  
道傍箐深狸伺鼠朝行縛人暮驅牯張目睚眦避無所  
仲家生苗若無主肆虐公然曠強弩野無烟市絕行旅  
飛鳥山山鍛毛羽爾獨胡為此焉處別家十年長兒女  
失意勿復論鄉土文章下筆造奇古詩法亦可籍湜伍

髮須如絲白縷縷宛然褒博說鄒魯及門弟子紛可數  
往往功名拾芥取先生齒豁五十五猶抱麈經應科舉  
廣文片擅寒且苦顧獨求之榮袞黼僅留僮僕喪資斧  
別我西行何踽踽我為爾歌爾起舞舞意低昂歌激楚  
而今輸邊方用武何處堪容腐儒腐桑榆有路行可補  
曷不去作咸陽賈

貴陽除夕次德尹去年此夜湘南見懷韻

秦城趙壁價誰償隻影隨身漫去鄉劍氣久寒思拂拭

雞聲無伴起徬徨吟殘蠟燭三更笛夢結春雲十畝桑  
不是無家輕遠別天南回首一推腸

敬業堂詩集卷二